

KERATAN AKHBAR

JUDUL : Harian Metro Online

TARIKH : Selasa, 17 Mac 2020



Covid-19: Premis, kawasan awam ditutup esok

SUSULAN perkembangan jangkitan koronavirus baharu (Covid-19) yang semakin meningkat, premis dan kawasan awam ditutup sementara mulai esok. Tindakan itu selaras dengan pengumuman Perdana Menteri Tan Sri Muhyiddin Yassin malam tadi yang mengisytiharkan Perintah Kawalan Pergerakan berkuat kuasa 18 hingga 31 Mac di seluruh negara bagi mengekang penularan wabak Covid-19 di negara ini.

Sehubungan itu, **Kementerian Tenaga dan Sumber Asli** mengarahkan taman Eko Rimba Bukit Nanas dan Hutan Simpan Sungai Besi di bawah seliaan Jabatan Perhutanan Semenanjung Malaysia (JPSM) ditutup berdasarkan perintah yang dikeluarkan kerajaan.

Selain itu, tempat-tempat awam di bawah seliaan Jabatan Perlindungan Hidupan Liar dan Taman Negara (Perhilitan) Semenanjung Malaysia juga akan ditutup sementara, katanya dalam satu kenyataan.

Tempat awam itu meliputi Pusat Konservasi Gajah Kebangsaan Kuala Gandah, Paya Indah Wetlands, Pusat Menyelamat Hidupan Liar Kebangsaan di Sungkai, Perak; Pusat Konservasi Hidupan Liar dan Pusat Pendidikan Biodiversiti.

Arahan penutupan itu juga terpakai kepada kampus Institut Penyelidikan Perhutanan Malaysia (FRIM) termasuk taman Botani Kepong dan Taman Etnobotani FRIM. Manakala, bagi Taman Negara Pahang, Taman Negara Kelantan, Taman Negara Terengganu dan Taman Negara Pulau Pinang tiada lagi permit masuk baharu akan diluluskan mulai hari ini.

Sementara itu, di **Perak**, Pengarah Jabatan Perikanan, Zaki Mokri berkata dalam satu kenyataan Pusat Konservasi dan Penerangan Penyu (PKPP), Segari, di Lumut ditutup sementara sehingga ke suatu tarikh yang akan diumumkan nanti memandangkan lokasi itu menjadi tumpuan ramai pelancong dalam dan luar negara terutama pada musim cuti sekolah.

Sunway Lost World of Tambun (LWOT) dalam satu kenyataan berkata, taman tema itu akan ditutup bermula esok sehingga dikeluarkan notis baharu.

LWOT akan melanjutkan pengesahan tiket untuk masuk ke Theme Park, Lost World Glamping dan Malayan Floating Villa menerusi rangkaian pembelian asal tiket. Selain itu, Politeknik Ungku Omar, Ipoh mengumumkan penutupan kampus dengan pensyarah diminta mengadakan kelas secara dalam talian mengikut kesesuaian masa dan perancangan kursus masing-masing.

Sementara itu, **Majlis Amanah Rakyat (MARA)** dalam kenyataan memaklumkan sesi pengajian, kuliah dan latihan industri bagi semua Institusi Pendidikan MARA (IPMA) di seluruh negara dihentikan sementara dan diselaraskan pada satu tarikh yang akan dimaklumkan kemudian atau dilaksanakan secara dalam talian.

Semua IPMA meliputi Maktab Rendah Sains Mara (MRSM), Universiti Kuala Lumpur, Kolej Poly-Tech MARA, GIATMARA, Kolej Kemahiran Tinggi MARA, Institut Kemahiran MARA, Kolej Profesional MARA, Kolej MARA, German-Malaysian Institute, Kolej Universiti Poly-Tech MARA dan Malaysia-Japan Industrial Institute.

Premis perniagaan MARA sama ada kompleks perniagaan, bazar, arked, kawasan industri dan medan selera turut diarah tutup bermula esok sehingga 31 Mac kecuali bagi pasar raya, pasar awam, kedai runcit, farmasi dan kedai serbaneka yang menjual barangan keperluan harian.

Bagi sebarang urusan berkaitan pembayaran, permohonan dan pertanyaan boleh dibuat secara dalam talian di www.mara.gov.my, menghubungi pusat panggilan MARA di talian 03-2613 2000 atau mengikuti media sosial rasmi MARA.

Di **Pahang**, Majlis Perbandaran Kuantan (MPK) memaklumkan penutupan sementara lokasi pelancongan dan fasiliti di bawah kendaliannya di Pantai Teluk Cempedak, Pantai Batu Hitam, Mini Zoo Teruntum, Pusat Rekreasi Balok, Bazar Serambi Teruntum dan terowong Sungai Lembing.

Pengerusi Jawatankuasa Pelancongan, Alam Sekitar dan Perladangan, Datuk Seri Mohd Sharkar Shamsuddin pula berkata semua acara pelancongan anjuran kerajaan negeri ditangguhkan serta merta, selain pihaknya tidak akan memenuhi acara atau jemputan rasmi acara pelancongan di dalam atau luar negara.

Di **Negeri Sembilan**, Pengarah Lembaga Muzium Negeri Sembilan (LMNS) Shamsuddin Ahmad berkata semua muzium di bawah pentadbirannya ditutup sementara sehingga 30 April ini.

Ia membabitkan Muzium Negeri di Bandaraya Seremban, Muzium Diraja Istana Lama Seri Menanti (Kuala Pilah), Muzium Rembau (Rembau), Teratak Za'ba (Jempol) dan Kompleks Megalith Pengkalan Kempas (Port Dickson).

Di **Pulau Pinang**, Pengerusi Lembaga Muzium Negeri, Yeoh Soon Hin berkata Balai Seni Lukis Negeri Pulau Pinang, Georgetown turut ditutup sejak semalam sehingga ke satu tarikh yang akan dimaklumkan.

Perbadanan Bukit Bendera Pulau Pinang (PBBPP) pula memaklumkan perkhidmatan kereta api funikular Bukit Bendera ditutup sementara bagi membendung wabak Covid-19.

“Bagaimanapun, memandangkan perkhidmatan kereta api funikular adalah satu-satunya pengangkutan kepada sesetengah penduduk dan sebahagian daripada komuniti di Bukit Bendera, ia akan dijalankan secara terhad kepada mereka mengikut jadual sepanjang tempoh 14 hari itu,” menurut PBBPP.

Di **Sarawak**, Menteri Muda di Jabatan Ketua Menteri (Hal Ehwal Islam dan DBKU), Datuk Dr Abdul Rahman Junaidi berkata, pusat penjaja dan premis makanan termasuk pasar malam di bawah kawasan Dewan Bandaraya Kuching Utara (DBKU) diarah menutup sementara operasi mereka berkuat kuasa esok sehingga 31 Mac. Menurutnya, perpustakaan DBKU di bangunan Majma Tuanku Abdul Halim Mua'zam Shah dan perpustakaan Komuniti DBKU, Muzium Kucing serta Taman Orkid di Pangkalan Sapi turut ditutup.

Dalam pada itu, Perpustakaan Negara Malaysia (PNM) telah menutup perkhidmatannya kepada orang awam mulai semalam hingga 30 April ini, melibatkan PNM Jalan Tun Razak, semua perpustakaan komuniti dan perpustakaan desa di bawah seliaan PNM.

Bagaimanapun, PNM menerusi hebahan dalam laman Facebook rasminya turut memaklumkan orang awam masih boleh melayari www.u-pustaka.gov.my yang menyediakan 13.2 juta bahan bacaan digital secara percuma.

Sementara itu, **Pengurusan Divisyen Tol IJM**, pengendali syarikat konsesi Lebuhraya Sungai Besi (BESRAYA), Lebuhraya Baru Pantai (NPE) dan Lebuhraya Kajang-Seremban (LEKAS) memaklumkan penutupan semua kaunter lorong tambah nilai dan di plaza tol kendaliannya.

Pengguna lebuhraya dinasihat memastikan baki kad mencukupi ketika melalui lebuhraya memandangkan transaksi tambah nilai masih boleh dilakukan di stesen minyak yang mempunyai perkhidmatan tambah nilai atau menerusi akaun e-dompet.